

(E - 116) श्रीमुनि राजत समतासंग

(मेरी भावना-राग)

श्रीमुनि राजत समतासंग, कायोत्सर्ग समाहित अंग; श्रीमुनि०
करतैं नहि कुछ कारज तातैं, आलंबित भुज कीन अभंग;
गमनकाज कछु हू नहि तातैं, गति तजि छाके निजरसरंग। श्रीमुनि० १
लोचनतैं लखिबो कछु नाहीं, तातैं नाशादृग अवलंग;
सुनिवे जोग रह्यो कछु नाहीं, तातैं प्राप्त इकंत सुचंग। श्रीमुनि० २
तह मध्याहमांहि निज ऊपर, आयो उग्रप्रताप पतंग;
कैधों ज्ञानपवनबलप्रजुलित, ध्यानानलसों उछलि फुलिंग। श्रीमुनि० ३
चित्त निराकुल अतुल उठत जंह, परमानंद-पियूष-तरंग;
'भागचंद' जैसे श्रीगुरुपद, वंदत मिलत स्वपद उत्तंग। श्रीमुनि० ४